



d'Schnuderbinggis

Melodie: I here-n-ee Gleggli.

1. Mir bläte und singe
Am liebschte Choral,
S'isch wäge de Sozi
Und unsrer Moral.
S'Prolete und s'Schnorre
Het dasmol kai Zwäck,
Au d'Schueldiktatore
Hän g'haue in Dräck.
2. Bim Bauamt dert obe
Wird gschunde und krampft,
Vom morge bis zobe
Dass s'Hirni verdampft.
E gaischtryche Schibel
Die Bauschangi juckt,
Der Einheitsmischtkibel
Isch's neischi Produkt.
3. Au unseri Fyrwach
Hinkt nit hintedry,
Sie fyrt's Jubiläum
Mit Schliff und mit Wy.
Zwor d'Gescht sin bitroffe
Der Tirk Isch verheit,
E mänge sig bsoffe
Ab der Laitere keit.
4. Am Kohlebärg unte
Stoht hit d'Polizei,
Sie trait jetz e Junte
Ganz wyss und ganz neu.
So schuldlos und mild
Schynt dä Schugger und winkt.
Uns tyscht nit das Bild
Was doch fuul isch und stinkt.
5. E gaschtligi Schwelle
Isch d'Schwyz immer gsi,
Me herts no verzelle
S'isch längschens verby.
S'Volk losst sich verfiere
Mit Wort no so gärn,
Und d'Tschingge regiere
Im Bundeshus z'Bärn.
6. In Ziri der Ge-we
Nimmt schwer iberhand,
E Blinde kas gseh
und fir d'Schwyz isch's e Schand.
Zerscht schmust me bim Bierli
Im Auto derno,
Und losst zletscht die Hierli
Ganz fidleblutti stöh.
7. Im Kichli versammelt
Isch's Fasnachtscomité,
Fir z'fyre der Albers
Doch dä losst sich nit gseh.
Er sitzt im Theater
Bim Neudeck so froh,
Dass är hett die Basler
Am Seil abegloh.

Kemmet alli am Sunntig z'Obe in grosse Muusig-
saal zuem Schlussobe vo de Comité-Schnitzelbänk.